

**DEWAN RAKYAT  
PEMBERITAHUAN PERTANYAAN  
MESYUARAT KEDUA PENGGAL KEDUA  
PARLIMEN KEEMPAT BELAS (2019)**

---

**PERTANYAAN : LISAN**

**DARIPADA : DATO' SERI ANWAR BIN IBRAHIM  
[ PORT DICKSON ]**

**TARIKH : 1 JULAI 2019 (ISNIN)**

**SOALAN :**

**Dato' Seri Anwar bin Ibrahim [ Port Dickson ]** minta **PERDANA MENTERI** menyatakan sejauh mana pelaksanaan reformasi Mahkamah Syariah yang telah dilaksanakan terutama dalam memperkasakan undang-undang Syariah yang lebih adil dan saksama.

**JAWAPAN: (YB DATUK SERI DR. MUJAHID BIN YUSOF,  
MENTERI DI JABATAN PERDANA MENTERI )**

Tuan Yang di-Pertua,

Untuk makluman Ahli Yang Berhormat, kerajaan sentiasa komited untuk mereformasikan Mahkamah Syariah melalui empat (4) aspek utama iaitu memperkasakan undang-undang Syariah, pentadbiran kehakiman Syariah, pembangunan prasarana Mahkamah Syariah dan peningkatan kompetensi Hakim Syarie. Antara usaha-usaha yang telah dilaksanakan adalah seperti yang berikut :

**1. Memperkasakan Undang-Undang Syariah**

- 1.1. Menggubal model draf undang-undang bagi tujuan penyelarasan dan penyeragaman antara negeri-negeri

seluruh Malaysia. Bagi tujuan ini, kerajaan sedang dalam proses menyeragamkan undang-undang kesalahan jenayah Syariah negeri-negeri seluruh Malaysia dari segi jenis kesalahan, jenis hukuman dan kadar hukuman.

- 1.2. Kerajaan juga melalui Jawatankuasa Kajian Penambahbaikan Undang-Undang telah menjalankan kajian untuk menambah baik undang-undang Syariah seperti yang berikut :
  - 1.2.1. undang-undang keluarga Islam;
  - 1.2.2. undang-undang tatacara jenayah Syariah;
  - 1.2.3. undang-undang tatacara mal Mahkamah Syariah; dan
  - 1.2.4. undang-undang keterangan Mahkamah Syariah.

**2. Mewujudkan Undang-Undang Baharu**

Selain daripada penambahbaikan undang-undang sedia ada, kerajaan juga komited dalam menggubal undang-undang Syariah yang baharu. Antara undang-undang Syariah tersebut ialah:

- 2.1. Rang Undang-Undang Profesion Guaman Syarie (Wilayah-Wilayah Persekutuan) 2019. Rang Undang-Undang ini dijangka akan dibentangkan pada sesi parlimen ini;
- 2.2. Rang Undang-Undang Wakaf (Wilayah-Wilayah Persekutuan) 2019 yang kini dalam fasa untuk dimuktamadkan. Rang Undang-Undang ini dijangkakan untuk dibentangkan di sesi parlimen akan datang; dan
- 2.3. Kaedah-Kaedah Undang-Undang Keluarga Islam (Wilayah-Wilayah Persekutuan) (Perkahwinan, Perceraian dan Ruju'). Kaedah ini dalam proses untuk mendapatkan kelulusan daripada Jabatan Peguam Negara.

**3. Memperkasakan Pentadbiran Kehakiman Syariah**

- 3.1. Pemeraksanaan pentadbiran Kehakiman Syariah melalui cadangan untuk mewujudkan hierarki baru Mahkamah

Syariah. Kerajaan sedang berusaha ke arah menaik taraf Mahkamah Syariah daripada tiga (3) peringkat sehingga kepada lima (5) peringkat. Setakat ini negeri Perak telah pun meluluskan usul di Dewan Undangan Negeri bagi menaik taraf hierarki Mahkamah Syariah daripada tiga (3) peringkat kepada empat (4) peringkat Mahkamah Syariah iaitu mewujudkan lapisan baharu yang keempat dinamakan sebagai Mahkamah Utama Syariah. Bagi memastikan keberkesanan perancangan ini, usaha-usaha untuk memperkasakan institusi Kehakiman Syariah di Malaysia telah digariskan di dalam Pelan Strategik Agensi Agama 2019-2025.

- 3.2. Memperkasakan Mahkamah Syariah melalui cadangan pengkhususan pengendalian kes hadhanah dan nafkah di Mahkamah Tinggi Syariah dan pengendalian kes nafkah di Mahkamah Rendah Syariah serta pewujudan Bahagian Penguatkuasaan dan Pelaksanaan perintah di Mahkamah Syariah Wilayah Persekutuan. Pelaksanaan program ini telah diluluskan melalui Mesyuarat Jemaah Menteri pada 8 Mei 2019 baru-baru ini dan dalam peringkat libat urus bersama agensi-agensi kerajaan yang berkaitan.

#### **4. Pembangunan Prasarana Mahkamah Syariah.**

Usaha-usaha yang telah dilakukan oleh kerajaan untuk membangunkan prasarana Mahkamah Syariah adalah seperti yang berikut :

- 4.1. Pembangunan Kompleks Mahkamah Syariah baharu di Jabatan Kehakiman Syariah Negeri / Mahkamah Syariah Negeri. Projek pembangunan Mahkamah Syariah baharu yang sedang dalam proses pembinaan ialah di negeri Sabah dan negeri Pahang; dan
- 4.2. Menaiktaraf sistem E-Syariah kepada sistem E-Syariah versi tiga (3) untuk penambahbaikan pengurusan sistem pengurusan kes di Mahkamah Syariah di seluruh Malaysia

dan meningkatkan lagi kecekapan penyampaian melalui transformasi sistem E-Syariah.

**5. Peningkatkan Kemahiran Dan Kompetensi Hakim Syarie.**

Usaha untuk meningkatkan kompetensi Hakim Syarie telah dijalankan melalui langkah-langkah seperti yang berikut :

- 5.1. Penambahbaikan berterusan modul utama latihan undang-undang. Pendekatan yang dilaksanakan ialah latihan wajib pemantapan undang-undang keterangan, aplikasi prinsip Islam dalam perbicaraan dan pemantauan prestasi haki-hakim melalui alasan penghakiman oleh Mentor.
  
- 5.2. Kolaborasi strategik bersama agensi akademik dan undang-undang. Mewujudkan kerjasama strategik dengan IPTA, Bahagian Lelongan Mahkamah Sivil dan badan penyelidikan awam dan bebas. Kerjasama tersebut dijangka dapat membangunkan modul latihan yang lebih efisien, kajian undang-undang dan hukum syarak yang memberi impak tinggi kepada jabatan serta latihan intensif Bahagian Sokongan Keluarga (BSK) bagi mempergiatkan penguatkuasaan perintah nafkah.

Sekian, terima kasih.